



蛇郎君

【第一幕：冉冉紅塵】

△場景：荒郊山景

蛇郎君：【七字仔】

百年道行不染塵，體面俊俏幻人形；
法術靈通雲上騰，盤據山中王自稱。
百花山中為大王，潛心修練道自通；
寶靈地穴盤蛇蟒，眾妖稽首勢如虹。

蛇郎君：【四句聯】

驚蟄響雷萬物現，冉冉紅塵為情緣；
幻化人形貌上顯，逍遙騰雲為大仙。

我乃，蛇郎君。修行數百年，幻化人形，盤據百花山中，蛇妖个个向我稽首為王！今天驚蟄初雷，百物回春，宛如世外桃源，無奇不有。著趁此時，遊玩山景，解一時的心悶，就此啟程。

【六角美人】

百花嬌豔日流連，鶯燕鳥囀將聲獻；
尾蝶飛來在身邊，宛如仙境在眼前。
茫茫清霧罩山上，幽雅之情是重重；

（李家三姊妹出場，恰蛇郎君相閃身過，麗月恰蛇郎君互相對看）

齊 唱：柳暗花明理成章，置身此外如夢中。

蛇郎君：前面三個姑娘，好親像是姊妹仔。尤其是上細漢的，生作非常嬌。凡人恰蛇妖果然大不相同，有親情、有愛情。紅塵之事，豈能是我會當瞭解，罷了！

麗 月：阿姐，咱著趕緊挽花，通好來到佛寺燒香拜佛，祈求阿爹恰阿兄出外平安順序。

秀 紅：是啦，麗月真是孝順，無怪阿爹恰阿兄上疼你。

春 花：好啦，日頭欲落山矣呢！最近聽講春天來到，一寡溜啦、蠓蟲攏走出來，咱著愛小心細膩，上驚著是拄著「色狼」。

蛇阿舅：小姐，你佇咧叫我？來！來予我啞(tsim)一下！

（三姊妹想欲逃走，秀紅無細膩予蛇阿舅攬著。）

秀 紅：你這個老不修，食甲遮濟歲猶閣愛風流！

蛇阿舅：我是抱著關心、愛心、同情心來向恁「熱情的擁抱」！

秀 紅：呸！啥物同情心啊！

蛇阿舅：拜託咧！你這般，胸坎若樓梯，腹肚若水櫃，台下觀眾十个查埔人來嘛無夠死，我猶是苦勸你，「趕快回家吃自己」！

秀紅：你啊，揣死！（拍武戲，蛇阿舅敗）

蛇阿舅：唉唷！你這狼毒的查某人，出手有夠重。人講：惹熊惹虎，毋通去惹著刺查某，緊來走啊！

秀紅：好膽莫走啊！

麗月：阿姐，好矣啦，毋通閣追人啦，逼虎是會傷人呢。

秀紅：啥物虎咧，明明就是三跤貓！

春花：好啦，天色已經暗，咱著趕緊來到佛寺燒香拜佛！麗月，你就向前帶路啊。

【第二幕：誤闖蛇洞】

△場景：荒郊山景

李正：【鑼鼓調】

翻山過嶺來到遮，迢迢路途往遮行；
採得花蕊欲回家，為著心愛的查某困。

我ooh，李正。來到這個山頭，是為著欲挽花予阮三个查某困，少年查某困仔插花上嬌啊！雖然我少年時就來死某，放下我恰三个查某困相依為命。雖然是散赤，生活亦是過了非常快樂。我猶是趕緊挽花，挽挽咧趕緊來去轉。（揣花蕊）ooh！這蕊，圓仔花，讚讚讚，適合阮彼个大漢的。這蕊！有夠大蕊，適合阮彼个第二的。白色的花，有夠清芳，這個適合阮第三的。我閣來揣看覓咧。

（lê頭揣，去拄著蛇郎君，驚一下）

李正：唉唷！

蛇郎君：阿伯你好。

李正：少年的你好。你出現攏無聲啊，害我驚一下！

蛇郎君：阿伯真是失禮，拄才的冒犯是真對不住啊。

（李正對觀眾講）

李正：嗯，這個少年仔有禮貌，看伊生做真緣投，一定是有錢人兜的少爺。

蛇郎君：阿伯，gâu早！

李正：Ooh！gâu早！自拄才出現已經向我問好幾落擺人，你看伊，恹恹的款，毋閣看起來是有錢人，若予我來做困婿，一定真好。

蛇郎君：阿伯仔，最近你是逐工來遮挽花是欲創啥？你敢知影遮的花，攏是我所管的？

李正：是你管的ooh？！真失禮啦！我挽花當然是挽轉去予阮查某困插啊！莫看我遮少年，我已經有三个查某困矣咧！

蛇郎君：Ooh？你有三个查某困，攏幾歲矣？

李正：講到這，我就非常的驕傲，個ooh！攏已經大漢矣！一个比一个閣較嬌ooh！

蛇郎君：阿伯，你是毋是有一个查某困叫做麗月仔？

李正：你哪會知？

蛇郎君：前幾日我看見三个查某困仔來到這個百花山中遊玩，其中一位姑娘名喚麗月，想袂到就是你的查某困。哈哈，按呢真好，你敢知影我是啥物人？

李正：毋知，你是？

蛇郎君：蛇郎君！

李 正：啥？蛇郎君！蛇郎君是啥？

蛇郎君：我乃是修練數百年，幻化人形，盤據百花山稱大王！

李 正：唉呀，拜見大王！

蛇郎君：阿伯請起，應該是我共你拜遮著啊！

李 正：是按怎講？

蛇郎君：【七字仔】

不如花蕊來交換，將查某困來嫁我；
家庭貧苦袂拖磨，女兒我會惜命命。

蛇郎君：你偷挽我的花，用恁查某困來交換，你想怎樣？

李 正：這……予我考慮一下！

蛇郎君：無須要考慮矣啦！

雖是蛇妖但善良，山中為王是梟雄；
獨欠王后伴洞中，向望阿伯將願從。

李 正：【七字搖版】

忽提要求太突然，恐驚願望袂實現；婚姻之事非童言，
不嫁女兒心意堅。

蛇郎君：你真實毋嫁？

李 正：毋嫁！

蛇郎君：閣問你一擺！你嫁毋嫁？

李 正：拜託咧啦，我亦袂生困啊，愛我嫁欲創啥？

蛇郎君：你猶閣敢佞我講耍笑！敬酒毋食你欲食罰酒。

【怒罵】

大膽狂言來戲弄，話語輕浮罪難當；
勸你歸順來投降，刀槍無眼不由人。

李 正：閣擗劍欲創我，唉，領頸生瘤，拄著矣！查某困嫁你就是矣啦！

蛇郎君：感謝岳父大人。這是娶親的掙定禮。三日之後我會來娶親，咱就一言為定！

【第三幕：天倫斷夢】

△場景：民宅

麗 月：【更鼓反】

雖是平淡的生活，閣較艱苦著看破；
全心奉養阮爹爹，孝順至親苦毋驚。

奴家，李麗月。阮三姊妹佞爹爹相依為命已經十外冬，雖是貧苦但安分守己，
人講，平安快樂就是福矣。爹爹出門時講欲上山剉(tshò)柴，如今天色已經暗
looh，為何不見阿爹咧？

春 花：唉唷！有夠忝啦！

麗 月：聽見聲音，一定是爹爹回來looh。

麗 月：原來阿姊，恁回來looh。

春 花：啊小妹仔，你佇咧厝ooh。

麗 月：是啊。

秀 紅：是啦，咱麗月上乖巧矣啦，毋知你厝內擗(piànn)掃甲啥款咧？

麗 月：我今仔日攞整理掃過一擺looh。

春 花：麗月，阿爹咧？為啥物阿爹攞無看著伊的人影咧？

秀 紅：是啊，我腹肚真枵neh！

麗 月：既然姊姊都枵矣，不如我就入灶竈準備暗頓，通好阿爹回來，咱會使做伙食飯矣！

秀 紅：好啦好啦！小妹你就緊去啊。

春 花：你ooh！真無規矩，逐擺攞偷拈(ni)菜。

秀 紅：哼，又閣是按怎啦！

李 正：唉！吵吵鬧鬧成何體統啊！

麗 月：阿爹，你出門去，是發生啥物代誌矣？

李 正：【七字白】

此事講起我心頭凝，好好挽花煞來惹不幸；

全盤愛怪我無小心，用彼花蕊啊換親情。

春 花：是按怎啦？

秀 紅：是啊，阿爹你就緊講嘛！

李 正：我……我……就是去拄著妖怪啦！

春 花：啥物啊？！妖怪ooh？

李 正：就是去拄著蛇郎君啦！

李 正：蛇洞巧遇蛇郎君，郎君提意欲聯婚；

講咱查某困乖巧閣單純，若無嫁伊，我就無身魂。

麗 月：【七字仔】

聞言聽見心頭冷，如此狂妄來表明；

人妖殊途天不允，為何強逼不講情。

李 正：【四句聯】

唉，阿爹也是不得已，挽花挽甲人的地盤去；

叫我查某困著愛來嫁伊，無我就一命歸陰司。

秀 紅：唉唷，妖怪就是妖怪！一定一開始騙阿爹講伊是好人，但是啊，無的確今仔日袂枵，明仔載就共你食甲一股骨都無賸ooh！阿爹啊，人講：「个人造業个人擔。」你就家己想辦法啦！

李 正：唉，春花啊，咱厝內查某困你上大漢，「男大當婚，女大當嫁。」，你是大姊，由你去嫁好無？

春 花：阿爹！阮無愛啦！「甘願躑躅受苦，亦毋願嫁予蛇精做某。」

李 正：唉，春花你既然無愛，啊無，秀紅你去好啊。

秀 紅：唉唷！各位觀眾啊，你共伊聽咧幾句？家己惹禍端，就查某困受罪，根本是「死道友無死貧道啦！」哼！唉唷！「甘願躑躅奉待你序大人，亦毋願嫁予蛇精入新房。」

李 正：唉，麗月猶閣細漢，才十五歲爾爾，又閣是我上心愛的第三查某困，敢愛伊去嫁予蛇郎君咧？麗月仔，我規氣來去予蛇郎君剖死好啦！

麗 月：阿爹，無的確蛇郎君是恰你講耍笑人啊！伊若真正來，我才來去嫁予蛇郎君。阿

爹，飯菜趁燒，冷去就無好食矣！「燒菜配燒飯，鹹鹹鴨母蛋；囡是阿爹的金合仔糖，阿爹做，由囡來擔當。」

李 正：麗月，你敢真正欲去？

麗 月：阿爹，你放心啦！無的確蛇郎君是咧恰你講耍笑的啊！阿爹！

李 正：唉！

麗 月：時到時擔當，無米才煮蕃薯湯啦。阿爹，來啦，飯菜著趁燒。

李 正：恁兩個ooh！恁阿爹都欲予妖怪害死，恁猶閣有心情食，共我去邊仔罰倚。

麗 月：【初一十五】

自古以來孝為理，麗月願換紅霞披；
一去不知是幾年，父女相逢是何時。

【第四幕：蛇郎君娶親】

△場景：街坊

蛇阿舅：轎夫仔！跤手著較緊ooh！

蛇郎君：【新送君別】

快馬加鞭莫延遲，眼看良辰已到時；
鼓吹八音來響起，身坐馬鞍又得意。
阿舅，前面就是李家looh！

蛇阿舅：我知啦！我上gâu講好話矣啦！叻呼！親家啊！

李 正：恁來矣ooh？

蛇阿舅：是啊，花轎都已經佇外口等矣咧！新娘是梳妝打扮好勢猶未？

李 正：麗月仔，你緊出來啊！花轎到looh，乖！我一个好查某囡。

麗 月：阿爹，請原諒麗月不孝，以後袂使佇咧你身軀邊共你照顧，無法度奉待你序大人，麗月就此拜別阿爹！

李 正：麗月仔，我知影你有滿腹的委屈，阿爹今生有你這個好查某囡，我也無所求矣。來！目屎拭拭咧，做一个上婿的新娘。阿爹嵌起你的嵌頭紅，希望你有好的歸宿，阿爹就安心looh。

蛇阿舅：安啦安啦！會共伊惜命命啦，時間也無早矣，緊ooh！

蛇阿舅：【四句聯】

新娘美貌似天仙，天地註定好良緣；
在厝父母好教練，應該敬老教少年。

李 正：我一个可憐的查某囡，天公伯仔，請你著愛有靈有聖，保庇阮麗月仔，平安快樂，嫁著一个好翁婿，天公伯仔！你著保庇ooh！

△場景：洞房花燭

O S：【遇佳人】

綾羅綢絲結新房，點燈結綵喜洋洋；
迎娶王后回仙鄉，鴛鴦伴侶傳佳良。

麗 月：【求婚】

看彼郎君好人品，面模俊俏好才情；

統領蛇界有本領，只怕難以猜測情。

蛇郎君：【說媒】

宛如天仙下凡塵，雖是兩人初見面；
動了凡心情難禁，對伊愛慕在我心。

麗月：對伊動了真性情，

蛇郎君：對伊動了紅塵心，

齊聲：對伊愛慕在我心。

〈雙人啉(lim)交杯酒，蠟燭歎(pûn)予伊hua〉

○ S：【人蛇姻緣】

金杯瓊漿憑雙爵，紅燭蠟淚倩影搖；
兩眼迷濛火映照，人蛇姻緣情意長。

【第五幕：思念親兒】

△場景：民宅

李正：唉，麗月仔，毋知你嫁去蛇郎君遐，敢有過著平安快樂的日子？麗月仔！你敢知影阿爹逐日攏咧想你？

秀紅：阿爹，唉唷！你逐日按呢毋食閣毋暍，緊早慢身軀是會拍歹去ooh！

李正：但是我真正想欲見著麗月。敢講做人爸母的無願意看著家己的囡兒？

春花：阿爹，當初時蛇郎君毋是有交代一跤籃仔予你，講想欲見麗月，著會使用這跤籃仔去揣伊矣！

李正：著ooh？我煞無想著，我入內來揸。秀紅、春花仔，恁敢有想欲佻我來去看麗月仔？

【雜唸仔】

麗月出嫁也有半年，阿爹日日夜夜思念伊；
想欲佻伊來相見，會得解我的相思。

春花：阿爹你毋通來衝動，人命關天是毋通；

李正：因為人命來關天，才著急來衝動；

秀紅：無定小妹早就來死亡。

李正：生死有命不是由你講，人講吉人自有好天相；

我逐日雙跔跪落求上蒼，爸囡相逢有希望。

阿爹：好，恁無愛去，我就家己來去。

△場景：荒郊山景

李正：蛇郎君有交代，只要共花掖落塗跤，就有人來tshūa路，來共伊試看覓。

蛇阿舅：是啥人咧叫我？

蛇阿舅：唉ooh！這敢毋是親家公仔？真罕行咧！

李正：媒人公仔，我有一件代誌想欲拜託你。

蛇阿舅：啥物代誌啊，你講無要緊，我這個人上熱心啊！

李正：我想欲看我的查某囡麗月啦！

蛇阿舅：好好好，今仔日佇遮佻你相見面，算是有緣；無，綴你來去見我的姪兒，順繼(sù)來見你的查某囡，麗月仔！

李 正：啊？我的查某困無死ooh？

蛇阿舅：拜託咧！是娶恁麗月來做王后呢！哪有可能死去啦！親家仔，你就綴予伊好咧，隨我來啊！

【第六幕：心起貪念】

△場景：金鑾寶殿

蛇郎君：麗月仔，你嫁來阮百花山也已經有半冬looh，毋知你敢會習慣？

麗 月：郎君，麗月出身貧苦，嫁來到山中享受榮華富貴，麗月已經感覺著真滿足矣，不過，我煩惱我的阿爹是毋是有食飽，有穿予伊燒咧？

蛇郎君：麗月，若準想厝、想阿爹，我會使陪你轉來去啊，順便拜訪丈人。

小 妖：報！國舅求見。

蛇郎君：宣伊進殿。

蛇阿舅：心中有急事，入殿會吾主。

蛇阿舅：拜見大王。

蛇郎君：免禮。來到殿上，有何事情咧？

蛇阿舅：我tshuā麗月仔的阿爹來looh！

蛇郎君：誠實的？既然如此，快快迎請！

麗 月：爹！

李 正：麗月仔！

【曲池】

叫聲麗月阿爹思念你，千辛萬苦會得來相見；

日日祈求上蒼保庇，保庇女兒會當好過日。

麗 月：麗月不孝爹操心，予爹逐日難入眠；

總盼今日情難禁，解脫想爹的苦境。

李 正：我的心肝查某困！阿爹足想你的！

蛇郎君：毋知岳父大人來到，無親身迎接，請岳父大人赦罪。

李 正：唉，我來遮是欲看麗月仔過了如何，是毋是有平安。

蛇郎君：阿舅，趕緊吩咐落去，排開宴席替岳父大人洗塵！

蛇阿舅：好，我來去準備。

蛇郎君：好looh，恁父女相逢，一定有真濟話欲講，不如替阿爹來洗塵，順便叫宮女來獻舞，予阿爹欣賞！

△場景：民宅

春 花：【點燈籠】

阮是待字閨中女，輕浮風騷無人比；

秀 紅：想著初戀糖蜜甜，愛著本姑娘較慘死。

秀 紅：阿姊，阿爹一去無回，這馬我也到愛嫁娶的年紀矣，我想欲嫁啦！

春 花：唉，阿爹一定是去予蛇郎君食掉矣！

秀 紅：毋管啦，叫阿爹替我做主啦，對面彼个有夠緣投！

春 花：阿爹生死不明，你上好死心啦。

李 正：我轉來looh。

齊 聲：是阿爹轉來looh！阿爹！

【雜唸仔】

阿爹一去過三年？逐日佇這盼望你；

一去無回無音訊，眼前所看敢是真？

李 正：恁講啥物我聽無啊！

春 花：阿爹著愛聽我講，時間確實有三冬；
個是蛇妖毋是人，歲月共咱過了無相仝。

李 正：一時踏入了仙界，日升日落流轉快；
轉到厝內猶原在，阿爹糊塗不應該。

春 花：阿爹，人轉來就好矣啦！

秀 紅：好咧佳哉有轉來，我的婚事有人做主裁；
無予蛇妖來破壞，想著嫁翁我就樂開懷。

李 正：來，春花、秀紅仔，麗月有等路欲送恁。

秀 紅：敢會是蛇郎君「親筆簽名照」一張？

春 花：你嘛咧三八！小妹無死，一定是享受榮華富貴，來看覓是啥物物件。

秀 紅：唉唷！純金的頭釵咧！小妹真正是嫁著好翁婿，變成好額人矣！

春 花：是啊，一定是食好閣穿好，真欣羨伊。

李 正：恁ooh，錢鬼！閣較榮華富貴若是無親人照顧，敢會較快樂？

春 花：阿爹，錢是萬能的啦！

李 正：唉，都毋知做了啥物失德代，生恁兩個不肖女。阿爹有夠忝，欲先入來去歇暍矣。

秀 紅：阿姊。

春 花：按怎？

秀 紅：籃仔啊！

春 花：籃仔是按怎啊？

秀 紅：阿姊，你是阿呆ooh，阿爹就是靠這較籃仔去揣麗月啊！

春 花：是啊，閣是按怎？

秀 紅：阿姊仔，人伊交陪攏是關公劉備，咱交的攏是林投竹刺。著愛靠這個機會去麗月
遐來去趁一寡金銀珠寶，順紲kā蹠hōo歡喜，你想啥款？

春 花：小妹，你真正足巧的ooh！事不宜遲，就趕緊來去。毋過，咱偷偷來去，阿爹敢
會煩惱咱啊？

秀 紅：安啦！我這時寫一張字條予伊。咱就緊來去，我足歡喜的neh！我欲變好額人
矣！哈哈！

△場景：荒郊山景

玉狐狸：我玉狐狸，日前佻蛇郎君交手後，雖然敗佇伊手下，不而過蛇郎君的存在確實對
我有威脅。個蛇類盤據佇咧百花山，我玉狐狸根本連頭都擡袂起來，袂使，我著
愛來想辦法。閣再講，蛇郎君的小妹蛇玉蓮美貌天仙，若準會當得著伊，哈哈，
就快樂賽神仙looh！

春 花：秀紅，你跤手較緊啦！

玉狐狸：有人來到，暫時閃避。

春花：小妹仔，你毋是講欲做有錢人，行路閣遐慢。

秀紅：拜託咧！蛇郎君伊金銀財寶若山咧，你是驚啥，袂生跂走去啦！

春花：你有聽人咧講無：「人兩跂，錢四跂。」毋較緊你著nóo-sut。

秀紅：咱趁錢有數，性命愛顧啦！小歇睏一下啦！

玉狐狸：小等咧！

秀紅：是啥啦？莫佇咧假鬼假怪，本小姐欲歇睏啦！

春花：Ooh ooh！春花你看，是一个緣投兄啊！一定是欲揣我的，緣投仔兄～！

玉狐狸：當然毋是。

秀紅：既然毋是，啊無你是……？

玉狐狸：狐狸精。

春花：妖怪啦！又閣是妖怪，這齣戲哪會遮爾濟妖怪啦！

玉狐狸：兩位姑娘毋免驚，我袂害恁，拄才聽兩位欲去蛇郎君的蛇洞，不如恁就佻我合作，到時陣恁欲愛佻濟金銀財寶，我攏會使予恁啊！

秀紅：真正的ooh？好啊！你緊講欲按怎合作咧？

玉狐狸：我到時藏跔你的手ńg內，然後tshuā我入蛇洞！

秀紅：騙我是三歲囡仔，一叢遮大叢想欲入去手ńg內底，真正是笑破人的喙！（玉狐狸施展法術）

玉狐狸：嗨！

秀紅：奇怪，啊人咧？

春花：佇你手ńg內啊！

秀紅：啊！我是猶未出嫁的查某囡仔，叫伊緊出來啦。

春花：噓！！恬恬！伊會幫助咱得著真濟的錢！乖！

○ S：我玉狐狸講話算話，只要恁乖乖合作，就有享用不盡的榮華富貴！

秀紅：好，阿姊，咱就緊來去！

【第七幕：危機四伏】

△場景：金鑾寶殿

○ S：【仙鄉歲月】

獻上珍寶佻絲綢，慶賀郎君有千秋；

設宴款待蟠桃酒，太平盛世慶萬壽。

蛇郎君：哈！今日乃是我蛇郎君大壽之喜，眾妖紛紛送來賀壽之禮，來來來！設宴款待啊！

蛇玉蓮：大哥，小妹知影今仔日是你的壽誕，特別準備禮物前來祝賀！

蛇郎君：哈！阿兄果然無白疼你。

小妖：報！

蛇郎君：有何事情來奏？

小妖：洞外有兩位自稱是王后的阿姊的人求見，請大王定奪。

蛇郎君：既然如此，快快迎接。

春花：唉唷，真正是金光閃閃neh！拜見大王。

蛇郎君：兩位阿姊何須如此客氣。

秀紅：唉唷，麗月仔！阿姊足久無看著你，阿姐足想你ooh！

麗月：麗月我也足想恁的。來來來，今天是郎君大壽之喜，阿姊兩人來了拄好，佷阮做伙慶祝。

春花：真歹勢neh！阮毋知今仔日是妹婿的生日，袂記紮等路，真失禮！

蛇郎君：兩位阿姊毋通按呢講，兩位阿姊來到百花山，無出去迎接，招待不週之處，望請多多包涵！

蛇阿舅：來looh！唉唷！你毋是山跤彼个刺查某！真好大膽呢，踏到阮的地頭來。

秀紅：是你對本姑娘無禮，佇阮身軀烏白hûe。

蛇郎君：阿舅，敢有影？

蛇阿舅：是有影啦，毋過，是無細膩的啦！想嘛知影阿舅無食遮穰！

秀紅：你！

麗月：阿姊，阿舅伊做人慷慨，只是較無重禮數，你就毋通佷伊計較。

秀紅：哼，本姑娘暫且就無愛佷你計較。

蛇阿舅：啊毋著感謝娘娘不殺之恩？！

秀紅：你……

蛇阿舅：奇怪，我一進殿就鼻到一陣的狐狸hiàn！咱山中也無狐狸，為何會有「狐臭」咧？

春花：啊著，秀紅仔！對咱兜路途遙遠來到遮，難免流汗，閣再講，秀紅真gâu流汗，秀紅！你講是毋是阿？！

秀紅：著……著啦！

麗月：既然按呢，我tshuā兩位阿姊來去休息，梳妝打扮了後，才來為阿姊洗塵。

春花：好啦！

麗月：兩位阿姊，隨我來。

蛇阿舅：毋知影啥物所在怪怪，感覺個兩人一定有問題！

蛇郎君：阿舅，你多慮looh！個是麗月的阿姊，阿舅，你就毋通想傷濟looh！

蛇阿舅：好啦！今日是我外甥大壽之喜，做人阿舅的來佷你淋兩杯仔！

蛇郎君：阿舅，我敬你。

蛇阿舅：做伙來！淋！哈哈！

△場景：房間

麗月：兩位阿姊，房間到矣，雖然無真高級，也算是四序，請兩位阿姊毋通棄嫌。

秀紅：袂啦！麗月，你暫且轉去，等待阿姊身軀洗好，才來去揣你！

麗月：好，小等我會送衫過來予兩位阿姊。

春花：好，就麻煩你ooh！

春花：恐怖啦！真正是驚煽(piak)空neh！毋著叫玉狐狸緊出來！

秀紅：玉狐狸，你緊出來啦！

玉狐狸：多謝兩位幫忙。

秀紅：現在欲按怎咧？你攏無講入來蛇洞是欲創啥neh？

玉狐狸：我是為著見蛇玉蓮一面。

春花：我都知影，咱閣予人利用去矣！

玉狐狸：兩位千萬毋通按呢想，恁是毋是真想欲金銀財寶咧？

秀紅：當然looh！

玉狐狸：不如，咱聯手來將個全部害死，咱就會使享受榮華富貴！

秀紅：啥貨？！親小妹neh？我做袂到啦！

春花：我嘛是啦！

玉狐狸：恁想看覓，個享受榮華富貴，恁蹠破爛的草厝仔，有一頓無一頓的生活，個是鴛鴦伴侶，恁是無人愛的少女，敢講攏袂怨妒？

秀紅：這……你講也毋是無道理，毋過我是劊雞劊鴨，就是毋捌劊人，這是欲按怎？

玉狐狸：我自有妙計。

春花：我感覺是無啥妥當，秀紅仔，我看咱來去轉啦。

秀紅：無喏！頭都洗一半矣，做落去就妥當啦！好矣啦！緊來去洗身軀！

（秀紅、春花落台）

玉狐狸：嗯，這盤棋是欲按怎行咧？

蛇玉蓮：兩位阿姐，是我！玉蓮啦！

玉狐狸：為何蛇玉蓮來到？

蛇玉蓮：莫非兩位阿姐去洗身軀？不如我將衫褲園踎桌頂，方便兩位阿姐換衫褲。（踏入房門）你是何人！為何出現在此？

玉狐狸：蛇玉蓮，你敢袂記得我矣是毋是？

蛇玉蓮：無恥的狐狸！三番兩次來擾亂，真正是毋知見笑！

玉狐狸：我堂堂一位修練得道的狐狸精，向你來求親煞無答應，你真正是毋知好糗！

蛇玉蓮：誇口！（拍武戲，蛇玉蓮敗）

玉狐狸：被我所擒，如今有啥物好講？

蛇玉蓮：要劊要割，由在你。

玉狐狸：我怎忍心咧！哈！

【第八幕：人事全非】

△場景：花園

麗月：兩位姊姊，隨我來！

【花嬌豔】

初次花園同遊賞，眼前景緻解心憂；

綠水池中金魚泗，也有水鴨伶鴛鴦。

春花：珍奇異寶真正濟，毋過毋知是啥貨；

秀紅：別的所在無通買，價值連城通變賣。

麗月：毋知兩位姊姊來到這個所在，蹠有慣勢無？

秀紅：當然喏！這攏是金光閃閃的宮殿，有合我的口味。

春花：是啊，來到遮迫迤，天氣又閣清朗，咱姊妹真久攏無來講心事矣。

秀紅：是啊，最近阿姐想欲嫁翁，攏煩惱無嫁妝，有夠可憐啦！

麗月：原來阿姐有意中人矣？

春花：伊烏白講啦！哪有啥物人欲愛伊。

秀紅：橫直無嫁妝是事實啊，嫁過去一定予人看無目地。

麗月：兩位阿姐，免煩惱啦！麗月早就準備一寡禮物欲送予恁。

秀紅：是啥物啊？？就緊提(thèh)來看覓啊！

麗月：我特別定做兩軀新衫，一寡的珍珠瑪瑙，欲送予恁。

秀紅：唉唷！小妹，你對阿姐真好neh！阿姐這時來打扮看覓。

春花：秀紅阿，想袂到「猴穿衫也會變成人」哈哈！

秀紅：麗月，按呢有嬌無？

麗月：阿姊真嬌neh！

秀紅：遐有一口古井，來去遐照水影好無？

麗月仔，到底是阿姊較嬌抑是你較嬌啊？

麗月：當然是阿姊啊。

秀紅：麗月，你看較斟酌咧……予你落去矣！（麗月看古井，秀紅揀伊落古井）

秀紅：哼哼，我計謀成功矣！

春花：這聲是欲按怎？

秀紅：我自有妙計！

△場景：金鑾寶殿

麗月：【陰調】

陰風陣陣吹過山，飄落異鄉身首寒；
蒙上冤枉無依倚，郎君你在何方啊？
被人殺害屍首不明，欲向何人報冤情？
為何血親無量情，兇殘殺害阮性命。
欲如何現身來表明？

蛇郎君：到底是為何事情，心中來掛懷咧？

麗月：郎君！

蛇郎君：是啥物聲音？是啥物人佇咧叫我？

麗月：郎君啊！

蛇郎君：麗月，我想你想得好苦啊！這幾日攏無見著你，你是走哪裡去咧？

麗月：郎君，妾身已經佻你陰陽兩隔，人鬼殊途。

蛇郎君：啥物！麗月，你已經死矣！

麗月：無毋著！我……是被我的大姊害死的！郎君啊！我死得好慘啊！

蛇郎君：好恨好惱啊！

秀紅：來looh！（麗月落台）

蛇郎君：你是誰？為何你面上罩著面紗咧？

秀紅：郎君啊，我就是你上愛的嬌某，麗月啦！因為最近身體無好，面色歹看，所以用一條面紗來遮著啦！

蛇郎君：為何你的聲音變成這款的模樣咧？

秀紅：因為我最近身體無好，就去寒著矣，聲音變了淡薄怪怪啦，郎君！你莫想傷濟啦！

麗月：郎君！

蛇郎君：真正的麗月在此，看你有何辯解？

秀紅：唉唷！麗月你欲死就死hōo去啦，佻我無關係啦！

蛇郎君：【七字仔快版】

向天借膽來假冒，欺騙於我氣難消；
瞞天過海誰不曉？應當處斬罪難饒！

秀紅：哀求大王將我放，一時貪財心迷茫；
不該假扮來戲弄，毋值為我怒氣動。

蛇郎君：你！真正是惡毒的查某人，連家己的親生小妹亦欲劊，你敢有人性啊？你真正是豬狗不如！

秀紅：大王饒命！

蛇郎君：饒命？你也會想欲活命？你害麗月敢有想過伊也想欲活命？你真正是天地不容啊！

秀紅：大王，一切毋是我所為啊！是玉狐狸唆使我按呢做！大王饒命！

蛇郎君：玉狐狸？可惡啊！恁攏是無恥的小人，害我家破人亡，失去了最愛親人，不只愛殺你萬千，閻愛劊你萬擺，才會當消除我心頭恨！

玉狐狸：哈哈，你講遮已經傷慢looh！你的小妹蛇玉蓮早就被我掠走矣！我玉狐狸這回敢來，欲來大鬧蛇洞，我玉狐狸全全伺候等恁！

蛇郎君：誇口！（拍武戲，蛇郎君敗）

蛇阿舅：啥物！這回玉狐狸果然來勢洶洶，拍算欲來破咱的蛇洞！是欲按怎啊？

蛇郎君：真正是愛我死，可惡的玉狐狸啊！阿舅，你敢有啥好計策講來看覓啊？

蛇阿舅：講！管一支長長透三樓啦！唉唷，先走要緊矣！

【第九幕：正邪對決】

蛇郎君：全是不中用，才會害你如此悽慘啊！

麗月：【都馬調】

毋敢妄想會得見你一面，感謝上天重逢在眼前。
受盡苦楚向望是有一擺，化身啼哭予郎君知。
殘忍的阿姊將我殺害，又命奴僕屍體隨意埋。

蛇郎君：我有所虧欠請你原諒，一切過錯就怪伊心肝雄，被人唆使破壞咱的天倫樂。

麗月：阮阿姊予人控制，才會心迷茫。

蛇郎君：唉！

麗月：連玉蓮也予人掠去，可惡的玉狐狸，真是太過份looh！郎君，按呢是欲按怎咧？

蛇郎君：這？

麗月：自細漢，阿爹就有教阮防止狐狸來偷掠雞，而且狐狸上驚火，不如咱就着火攻來對付伊！

蛇郎君：狐狸生性狡猾，有真濟巢窟，萬一逃回巢窟內，到時陣顛倒是咱受災殃啊！

麗月：若準派人嚴督每一個洞口咧？

蛇郎君：竟然有此妙計，咱事不宜遲，即時回轉百花山點兵前往攻破狐狸巢窟啊！

△場景：山景

（出台堵陣，拍武戲，玉狐狸敗）

玉狐狸：【串調仔】

可惡蛇郎君太酷刑，千萬大軍殺到面前；我有英雄的本領……

春風嫂：光頭白日你莫陷眠！

玉狐狸：你是啥？

蛇阿舅：報予你知！你所看就是，阿舅我本人！
看招！

玉狐狸：啥物武器這威猛？害我魂魄離身難安定！

蛇阿舅：你的目矚生佇頭殼頂，這就是有名的掃帚神！

擯予你死，擯予你扁，共你電佻金，啲～金爍爍！

麗月：阿舅，你小心啊！（玉狐狸掠著麗月做威脅）

蛇郎君：你欲做啥物？趕緊放開麗月！

玉狐狸：哼！蛇郎君！恁敢來攻打我的巢穴，閣用火攻來攻打我，算你利害矣！我若愛死，恁也要陪葬矣！

秀紅：嗨！（揆玉狐狸一刀）

玉狐狸：賤婢啊！

（玉狐狸負傷，蛇郎君取玉狐狸性命）

麗月：阿姊，為何你欲按呢做咧？

秀紅：麗月，阿姐知影我對不起你，不應該貪財害命，阿姊對不起你。今仔日阿姊替你一死，也算是還你一條性命佻報答蛇郎君的不殺之恩矣！

麗月：【都馬調慢版】

叫聲阿姊你來犧牲，帶念咱猶有姊妹情；
看見阿姊我於心不忍，拋落麗月孤零一生。

秀紅：阿姊有錯不敢言，羞愧毋敢入閻羅殿；
就算刀山油海雷火閃電，也不能抵銷這段孽緣。
阿爹老邁望你照顧，我就此一別袂閣再惹風波；
世上只有親情上好，照顧阿爹，就勞煩你代勞。

麗月：阿姊！

○ S：【寒門秋月】

世間只有親情好，孝敬至親困之勞；
雖是犯錯願改過，浪子回頭是清高。

創作理念

蛇郎君，是臺灣耳熟能詳的民間故事。在我小時候的時候，常常聽長輩說蛇郎君的故事，直到我長大後，才發現臺灣的民間故事已經在臺灣人的腦中消失得所剩無幾，反而都是外國的童話故事居多。在進入大學後，學習到臺灣文化的美，反觀現今歌仔戲劇本，皆以中國故事為題材居多，希望藉由戲劇表演，傳達給觀眾臺灣民間故事的文化，也透過看戲的傳播，能夠讓臺灣文化深植大家的心，進而有多人來關心臺灣文化。

鄭家和

臺中教育大學臺灣語文學系

